


TUPAI MIAI



BORNEO LITERATURE BUREAU

TUPAI MIAI

Ditulis

FELIX AMBON

Gambar digaga

HARRY ANDING



BORNEO LITERATURE BUREAU

© BORNEO LITERATURE BUREAU, 1967

PERPUSTAKAAN DBP/SAR.	
No. Kelas:	
No Perolehan:	
Tarikh:	T.T.

Dichelak

CASLON PRINTERS, LTD.

HONG KONG

JAKO PENULIS

NYADI AKU tu nulis ensera. Ensera tu ngerintai pengawa Tuai Antu. Nya alai apin aku berengkah nyebut batang ensera, dulu aku enda tau enda mansut ka jako sampi sereta enggau basa.

Nya alai enda meh aku tu layu nyebut nama Tuai Antu, tuai orang di Panggau Libau lendat biau daun isang, laban pala aku tu udah ditata lala minyak garu, nyawa aku tu nguyu leka pelaga ayu. Jari aku tu ngenggam genteran sangkoh lunju. Kaki aku bediri di segi gam batu. Nyadi penemu enggi aku nadai bengat lilih bengat lebih, tang deh alai aku tak nyau baka ke changka dipeda kitai maioh tu laban kena iring pengawa kamaia hari tu, kitai nyau dibai orang ke tuai nyimpan sempekat nyimpan ensera dalam surat. Nya alai kena iring jako nya, nya meh kabuah aku tu nyau deka enggau orang maioh tu nguji dalam sakali tu nusoi pengawa Tuai Antu. Nyadi orang ke dikumbai kitai Tuai Antu nya sida Keling Gerasi Nading Bujang Berani Kempang, sida Bunga Nuing Manok Biring Sempidan Arang sida Pungga Bau Ngena Ngengkang Lelayang sida Pandak Sagatak datai ari Urat Nyintak Padong Anak Ular Kendawang. Sida nya kenyau kalia iya alah datai ka diatu endang ka chuan ka peduman ka tenggau ka lalau kitai diau. Samoa pinta samoa selada kitai ngagai sida nya magang. Nya alai besai meh basa kitai enggau sida nya.

Nyadi ensera aku tu dikumbai aku Tupai Miai. Tu endang nampong batang ensera tuai, tang deh laban iya nadai kala udah dipasok ka dalam bup, nadai mega iya udah bebatang bendar kena tusoi.

Nya alai apin aku ngelengka ka pun enteran jako tu, dulu aku mansut ka jako sabar saleka dua nyangka tusun ensera enggau enteran jako aku ditu bisi nyima bisi mansa kitai, utai tu ukai datai ari ati aku, tang nyema iya bisi bakanya laban nya naka ulih adu ka leboh maia ngerintai leka ensera.

FELIX AMBON

GENTERAN

<i>Telian</i>	<i>Daun</i>
Bedula Pengaroh	1
Nyumpit Ka Ulu Panggau	4
Keling Tesat	5
Nyumpit Tupai	6
Batu Tekup Bedaup	9
Ini Burong Ruai	11
Ini Manang Empelai	12
Rumah Lang	13
Ruai Embuas	14
Berandau Enggau Embuas	15
Damu Ngayap	16
Bujang Paku Lawang	21
Bibat	23
Betetak	24
Batang Tapang	26
Nyala	29
Bumai	30
Ngayau	33
Enchaboh Arong	45
Ngabang	48

BEDUA PENGAROH

NYADI KALIA menya orang di Panggau Libau Lendat Biau daun isang meda bala apai indai sida nyau tuai magang, dia Keling Gerasi Nading bujang berani kempang bisi ati deka mai sida sarumah bedua pengaroh tuai sida iya awak ka sama naroh enggi diri empu. Apai indai pan agi ga bedau idup bisi meda sida bedua nya. Nya alai leboh udah badu makai lemai siti, dia Keling lalu ngangau ka Bunga Nuing Manok Biring sempidan arang seduai Pungga Jelayan Muda bau ngena ngengkang lelayang.

"Nya alai aku bakanya ga adi, aku ke ngangau ka seduai kitu, ngasoh seduai madah ka kitai sarumah tu, bai begempuru ngagai ruai aku kitu ka magang enggau indu enggau anembia," pia ko Keling.

"Nama kabuah nuan ngempuru ka kitai sarumah deh aka?" pia deh ko Bunga Nuing seduai Pungga.

"Oh, ila meh seduai nemu, kitai ga mansang empuru ka kitai sarumah," ko Keling.

"Kati alai enda tau ditusoi ngagai kami dua deh aka? Baum mai samoia kitai kai bujang tu bebini nuan tu," pia ko seduai nganu Keling.

"Au, ti baum ka nya lagi ga seduai ninga," pia ko saut Keling.

Bejalai kenu seduai nengah rumah panjai sahari tajai ngakak ngelayang, bejalai seduai iya niti rumah pandak punggang setak nyilup remang.

"Nya alai kitai sarumah tu barang bedengah sigi, dua, tiga, katash magang, sama empuru ngagai ruai aka Keling," pia deh ko jako seduai iya ke bekumbai baum.

Enda lama udah nya datai menatai samoia meh orang ngagai ruai Keling ga udah dikumbai Pungga seduai Bunga Nuing. Nyadi indu anembiaik nadai meh enggau, laban sida nya enda tau enggau baum ko padah seduai. Anti Keling datai, nadai ga orang agi datai kia.

"Nama kabuah kitai sarumah tu tak nadai datai deh adi Pungga?" pia ko Keling nganu seduai. "Kati ko jako padah seduai tadi?"

"Eh, barang apin bisi dengah enda diasoh kami dua kitu ka tadi," ko seduai.

"Oh, dini tau bakanya padah deh. Seduai tak tembu jegak-jegak ngapa baka ka enda tuai," pia ko Keling Gerasi Nading Bujang Berani Kempang.

"Eh, ti salah melinya, padah ka baru meh," ko saut seduai.

Bejalai baru ga seduai ka setak-setak. "Kitai sarumah tu empu empu magang-magang ngagai ruai Keling ka setak kin," pia deh ko seduai.

Nya baru angkat magang mega orang maioh. Nyau udah sampal datai samoan sida sarumah dia, Laja Penyampu Leka Balang Berang lalu bejako.


"Nya alai ke tu Buat samoan kitai sarumah tu udah sampal datai, lalu tusoi nuan dia kabuah kitai empu tu," pia ko iya.

"Enti melinya ngetu dulu kitai tu randau bukai awak ka aka Keling nusoi kabuah kitai empu," pia ko jako Pandak Sagatak datai ari tanah burak tetak lempuang.

Nya alai Keling lalu belaboh nusoi utai ti dikauum ka sida. "Aku mai kitai sarumah empu lemari tu meda sida apai indai kitai nyau tuai. Nya alai aku deka mai kitai sarumah tu bedua samoan pengaroh tuai kitai, laban kitai sarumah tu sama empu ubat tuai nya magang, awak ka sida pan agi ga meda kitai bedua nya," pia ko jako Keling nganu sida sarumah.

"Ukai nama agi Buat," ko Laja. "Ngelamatu mina nuan naroh, nuan ga endang ari adu ari ator kitai ga nuan ke naroh. Kadua, bilik pan endang bilik lama kitai ga ba nuan ditu, nya kabuah ditu alai ubat tuai kitai ngelamatu. Nya alai diatu nuan nyau mai bedua, manah ga bakanya, awak ka sama naroh sama ngintu enggi diri empu. Aku nadai muai ator nuan Buat ba senentang tu, tang pia pan ko aku ni deh ko sida maioh. Ni ko runding nuan deh Aya Bujang Tuai?" pia ko Laja nganu Bujang Tuai. "Awak ka jako jampat teputar, sida ka biak nadai endor sida iya enda nunda jako kitai ka tuai tu," ko Laja.

Aya Bujang Tuai lalu bejako. "Aku pan munyi ko nuan nya meh ati enggau jako, tang tandok rusa ke periga pampang tiga, nya enda tau enda ditaroh akan Keling, laban nya endang dikenai



Bedua Pengaroh

iya matak anembiak nurun nyerang. Nya alai taring uting babi menoa kitai nya endang enggi Akan Laja laban iya humor dua matak orang. Nyadi puchong ubat mali rampong kitai nya aku naroh laban aku tuai kitai ngempeng perabong. Nyadi pengaroh bukai nya pedua sida bukai bela-bela, awak ka sabaka nadai kurang. Nya ator aku, kitai ke bedua pengaroh tuai kitai, ti iya kena asai ba ati kita maioh nya," pia ko jako Bujang Tuai nganu sida sarumah.

"Nya alai ator nuan tadi aya kami ka anembiak tu nadai mantah ator nuan," pia ko Pungga nyaut Bujang Tuai.

"Nya alai enti melinya udah putus aum kitai bedua ubat tu," ko Keling. "Tang agi bisi jako siti enggau kitai ke ditu, laban kitai lama bendar udah enda ensepi jelu enda ensepi burong, nya alai tu mai kitai sarumah tu nyumpit aku pagila."

"Nyadi jako nuan nya Buat, tak diserangkong aku samoa sida ke biak, laban amat lama kitai tu udah enda ensepi jelu," pia ko jako Laja Penyampu Leka Balang Berang. Orang lalu pulai tindok magang-magang.

NYUMPIT KA ULU PANGGAU

NYADI UDAH tawas hari pagi siti, dia Keling lalu ngasoh indai iya berapi. Berapi kenu indai Keling surong kaki surong jari, kaki enggi iya baka ke sengat semada, jari baka ke muar kesa, asap datai di para asi pan dirara, asap datai di perabong asi pan ditanggong. Udah nya lalu disungkit iya asi nyau betuchong baka menyaong Langgong Satulak. Tuang lauk mili-ili baka kerapa Nanga Tisak. Iya lalu ngumbai makai.

Makai Keling nengali damai, ngempa nengali pinggai, ngisi dabuni perut gentong kenyang sayang saripi apong, lalu ngirup kenu iya tengkurup munyi ai rajang tetunggang, ai siuh ka lubang, lalu pansut ka ruai. Datai di ruai lalu mai sida sarumah begari, lalu dibelit ka iya sirat tabu, tak merundu-rundu mangka di teku pelepetan puang, lalu dipasok ka iya baju beludu tenun indu antu datai ari ulu kampong

Nyumpit Ka Ulu Panggau

puang, lalu belit ka iya labong lalong baka sengkilong tedong tiang. Pasok ka iya engkerimok baka ikan kamujok parai telentang, pasok ka simpai rangki baka anak samalau ili nepan di rangkang, lalu ditangkin iya temilah redah baka ke deka besembah mansang sambiang, lalu ditangkin iya pedang panjang pengundor anto bala nyerang, lalu di sampitan sumpit tapang.

“Nya alai kitai tu,” ko Keling, “anang tentu maioh tuboh sajalai. Nyadi kitai tu ngagai kampong Ulu Panggau, lalu melunggang ngagai Gelong Batu Benang.”

Udah nya sida lalu nurun. Nyumpit orang sahari-hari. Oh kati pemaioh jelu jangkit ulih orang, kati pemaioh burong agi ulih sida. Hari pan nyau ka lemai, samoan orang ke nyumpit pan pulai magang. Datai di rumah dia bala indu anembiaik begau betunu ka jelu, betunu ka burong ulih orang ke nyumpit sahari nya.

KELING TESAT

NYADI NYAU jauh lemai, dia Indai Keling lalu pansut ari bilik ngagai Apai Keling ka ruai. “Ni Dom tu deh Orang Tuai, nadai udah datai? Tu lemai lama bendar udah, orang ka biak deh maioh udah tindok,” ko iya nganu Apai Keling.

“Nadai, enda kabuah Dom tu nadai pulai,” pia ko saut Apai Keling, “padah ngagai Igat Laja, awak ka iya mai orang ngiga malam tu,” ko iya.

“Eh! Nuan! Samoa utai tak aku magang asoh, tak nadai pengirau mimet. Ukai nya kala laun ari orang Dom pulai, enti iya nadai pemedis nadai utai nganu,” ko Indai Keling.

“Eh, dini utai bengat bisi nganu iya,” ko apai iya.

“Eh, kampong ke endor iya turun,” ko indai iya.

Nyau kalama seduai bebelit ka jako, angkat Laja ninga ari iya ke gali di panggau nat ka diri lelak bekau nyumpit. Iya lalu nyapa seduai. “Nama utai ko seduai?” pia ko tanya iya.

“Eh,” pia ko Apai Keling. “Badunda meh Igat. Kita ke nyumpit

MAKLUMAT SELANJUTNYA BOLEH DIDAPATI DI:

KOLEKSI BORNEO

Pusat Dokumentasi Melayu Tun Hamdan Sheikh Tahir
Dewan Bahasa dan Pustaka Cawangan Sarawak,
Jalan Tun Datuk Patinggi Haji Abdul Rahman Yaakob,
Petra Jaya,
93050 Kuching, Sarawak.

Telefon: 082 – 227 000
Faksimile: 082 – 227 088
E-mel: eborneo@dbp.gov.my

“Memelihara Warisan Memupuk Wawasan”

